

**Jati Tidak Akan Terlibat PRU - Dr Hasan Ali**  
**mStar Online**  
**Februari 16, 2012**  
**Oleh ARIFFUDDIN ISHAK**

**SHAH ALAM:** Datuk Dr Hasan Mohamed Ali menegaskan pertubuhan bukan kerajaan (NGO) baru yang dikenali sebagai Jalur Tiga (Jati) tidak akan terlibat dalam politik atau bertanding dalam pilihan raya.

Malah beliau memberi amaran agar ahli Jati supaya tidak mengheret pertubuhan itu bagi meraih sokongan sekiranya mereka bertanding sebagai calon bebas.

Jelasnya, ahli Jati tidak dihalang untuk bergiat aktif dalam politik malah dibenarkan untuk menyertai pilihan raya tetapi bukan atas nama Jati.

"Ahli-ahli Jati yang mahu masuk dunia politik termasuk bertanding dalam pilihan raya, itu tidak ada masalah.

"Mereka bertanding bukan bawa nama Jati, mereka bertanding sama ada mewakili parti-parti pilihan mereka atau bertanding atas nama bebas...itu mereka boleh lakukan.

"Tetapi mereka tak boleh bawa logo atau nama Jati terbabit dalam gerakan politik. Itu kita tak boleh biarkan," katanya pada sidang media pra-pelancaran Jati di sini, Khamis.

Sementara itu ditanya sama ada beliau akan bertanding pada pilihan raya umum akan datang atas tiket bebas, Hasan berkata: "Perkara itu saya akan jawab bila Parlimen dibubarkan."

Beliau dipecat dari PAS Januari lalu setelah mengkritik tindakan menyeru ahli-ahli parti itu menyertai perhimpunan di luar pekarangan Mahkamah Tinggi Kuala Lumpur bagi menyokong kes liwat Datuk Seri Anwar Ibrahim.

Jati akan dilancarkan secara rasmi pada 21 Februari ini di Pusat Konvensyen Shah Alam.

Penubuhannya bagi memperjuangkan tiga elemen utama iaitu bagi menjaga kepentingan umat Islam, masyarakat Melayu dan mendaulatkan institusi beraja.

Hakcipta Terpelihara © 1995-2012 Star Publications (Malaysia) Bhd  
Source:

[http://mstar.com.my/berita/cerita.asp?file=/2012/2/16/mstar\\_berita/20120216161834&sec=mstar\\_berita](http://mstar.com.my/berita/cerita.asp?file=/2012/2/16/mstar_berita/20120216161834&sec=mstar_berita)